



Monsieur Claude Wiseler
Präsident vun der Chamber

Lëtzebuerg, de 5. März 2025

Här Präsident,

sou wéi den Artikel 81 vum Chambersreglement et virgesäit, bieden mir Iech, dës **dréngend** parlamentaresch Fro un de Minister fir Educatioun, Kanner a Jugend an un d'Ministesch fir Mobilitéit an ëffentlech Aarbechte weiderzeleeden.

Rezent goufen d'Eltere vun de Schüler:innen aus dem Lycée Robert Schuman doriwwer informéiert, dass et urgent Problemer un engem Deel vun de Gebailechkeete vum Lycée gëtt, esou dass a verschiddene Klassenäill keng Coure méi gehale kënnen ginn. D'Schüler:innen an d'Personal ware kuerzfristeg gezwongen, d'Räim ze verloossen, ouni dass si weider Erklärungen oder Begrënnungen kritt hätten. Och d'Direktioun vum Lycée soll vu Bâtiment public keng Erklärungen kritt hunn, aus deenen ervir gaange wär, ëm wéi eng Problemer et sech konkret géif handelen, et soll just däitlech gemaach gi sinn, dass et urgent, mee awer net geféierlech wier. Verständlecherweis mécht déi kommunizéiert Urgence a Verbindung mam Secret iwwert d'Natur vun de Problemer am oder um Gebai villen Elteren, Schüler:innen an Enseignanten trotzdeem grouss Suergen.

An deem Kontext wëllt mir de Ministere folgend Froe stellen:

- Kann d'Regierung de Concernéierten hier Ängschten huelen a matdeelen, wiesou zum aktuellen Zäitpunkt an engem Deel vum Gebai vum Lycée Robert Schuman keng Coure méi gehale kënnen ginn?
- Wéi eng urgent Aarbechte müssen duerchgefouert ginn opgrond vu wéi enge Problemer?
- Wiesou gouf entscheet, d'Direktioun, d'Personal, d'Elteren an d'Schüler:innen am Onklaren ze loossen, wat d'Natur vun de Problemer um oder am Gebai ugeet?

Mat déiwem Respekt,

Francine Closener

Deputéiert

Ben Polidori

Deputéierten



Gemeinsam Äntwert vum Minister fir Educatioun, Kanner a Jugend, Claude Meisch, a vun der Ministesch fir Mobilitéit an ëffentlech Aarbechten, Yuriko Backes, op d'parlamentaresch Fro Nr. 2011 vun den honorabelen Deputéierte Francine Closener a Ben Polidori

Ad 1)

Opgrond vu Constaten, déi duerch Analysen am Kader vu Renovatiounsaarbechten am Gebai vum Lycée Robert-Schuman (LRSL) gemaach goufen, ass festgestallt ginn, datt eng Rei Bauelementer net méi den haitegen Ufuerderungen entsprechen. Zwee onofhängeg Experten sinn esou zur Conclusioun komm, datt d'Struktur vum Gebai prinzipiell an der Rei ass ausser verschidde Bëtongsdallen.

Dofir gouf konsequent a preventiv am Interêt vun der Sécherheet vun de Schüler an Enseignantë gehandelt an decidéiert, déi iewescht Stäck vum Gebai vum LRSL net méi ze notzen. De Rez-de-chaussée ka weider ouni Risk benotzt ginn, well hei d'Struktur duerch eng Rei Stabiliséierungsmesuren verstärkt konnt ginn.

Déi doduerch betraffe Coursë sinn no der Fuesvakanz an den Institut national des langues Luxembourg (INLL) verluecht ginn.

Ad 2)

No den éischte Sondagë muss eng verdéiften Analys duerchgefouert ginn. Doropshi wäerten déi néideg Etudë kënne lancéiert ginn, fir déi eventuell noutwendeg Aarbechten ze definéieren an hir Ëmsetzung ze plangen.

Spéitstens ab Hierscht 2025 sollen déi doduerch betraffe Raimlechkeeten duerch provisoresch Modulbauten, viraussichtlech am Haff vum LRSL, kënne kompenséiert ginn. Dëst wäert et dem Lycée erlaben, och bei gréisseren an zäitopwenneg Renovatiounsaarbechte beschtméiglech ze funktionéieren.

Ad 3)

Et stëmmt net, datt déi Concernéiert am Onklore gelooss goufen. D'Direktioun vum LRSL war vun Ufank un an den Informatiouns- an Entscheidungsprozess agebonnen, an et ass zesummen no enger Léisung gesicht ginn, fir d'Kontinuitéit vum Schoulbetrib ze assuréieren.

Den 12. Februar gouf an engem Communiqué transparent iwwert d'Situatioun am LRSL informéiert, sou datt all déi Concernéiert déi néideg Informatiounen kruten.

Lëtzebuerg, den 20. Mäerz 2025

De Minister fir Educatioun,
Kanner a Jugend

(s.) Claude MEISCH